

Ze'j hebt me'j mooi be'j de piere

Peter Kroamer

Schriefft ze in de Darde KIokke dat ie luu nog vulle be'jdraagn van me'j kunt verwacht'n. En ik weete nargens van. Anderzieds bin'k best 'n bettien greuts. 'T höld in dat ze (wie 't dan ook weez'n mag) mien pennestreek'n nog niet zo verkeerd vön'n. En wat ie luu niet weet, 't verdient machtug goed en dat past me'j as 'n schniedig buisie. Maar a'k dan leeze wat Bats Makkinga en Harm Takman schriefft, dan vuul ik me'j toch nog 'n snotneuze. Die luu weet zo völle meer van old Omm'n as ik en wat mut ik dan nog schriem?

'T zelfde overkump me'j a'k leeze over Trammelantia. 'K hebbe d'r wel van e'heurd en ik meene dat de jong's van Gerrits van 't Zwarte Peerd doar de gaankmakers van waar'n. Maar völle meer weet ik d'r niet van, want Leida Bruuns zol zegg'n: *Ie hadd'n de raand van'n pot nog in 't gat stoan*. Trammelantia, 't mut 'n stuk ofwat jong'n e'wes hebb'n die as veur wat leem'n in de kalme Ommer brouwere'je zorg'n zoas met doen an 'n optoch of meziek maak'n en 'n stukkie opvoer'n as cabaret. Rond 1960 hef d'r ook zo'n grupie bongels 'ewes van 'n joar of 15, 16, 17: *de Lodderaars*. Die jong'n hadd'n gemien dat ze sport en magies belangriek vön'n, van sport hadd'n ze 't meeste verstaand, voetbal, schaats'n loop'n on hard jaag'n op de fietse. Ik zal oe de twaalf leed'n nuum'n: Gerrit Bouwhuis van Hendrik Bouwbuis an de Haav'n, Dick van Elburg (Dikkie Oco), Henk van Elburg (Henke van de Schipper, 'n ome van Henk van Elburg van de H.K.O.), Jan Jutten van de bakker, Peter Kramer, Jan Makkinga (Rooie Flip), Gerrit Makkinga (Max van Gait van Ab van Marie), Joop Melenhorst (Jopie), Co Siero van de Gemienteopzichter (Sjoepsel), Bé Steen (Be van Dijks, umme niet in de warre te komm'n met Bé van Tante Dienneke), Gerrit Steen (Gaitie van Café Mans Stien), Johan Willemsen (Wilkes).

We'j deud'n 'n individuel tiedrit. Dan jaag'n ie rond deur Besthum en ie kwaam'n weerumme op de olde brugge, woar as de aander'n oe tied opnaam'n. Mangs smakk'n ie d'r lilluk oaf en Bé van Dijks maak'n 't nog gekker. Den lag plat veuroaver op de fietse en zo jaag'n e op 'n Stationsweg met 'n kop pardoes in 'n groot'n glaaz'n bascule den achter op de Volkswaag'n busse van groenteboer Ophof hunk. He'j kwaamp slim te passe en hef'n wekke of wat in 't ziek'nhuus e'leeg'n. Wat wieder in de tied werd 'n Lodderholt op 'e spuit veur huuz'nbouw, maar eerst Iegg'n ze de weeg'n an. Dat was machtug mooi asfalt om oaver hen te jaag'n en ie kunt al road'n, doar uut voort kwaamp de naame "de Lodderaars". Wie as 't bedag hef weet ik niet meer, maar hoe as 't ook was, de Lodderaars gung'n 'n wielerronde organiseer'n op gewone fiets'n. Ze'j leup'n de winkels oaf veur priez'n en scharrel'n vanals be'j mekare: 'n flesse wien van Kouwen en Gait Stegeman, 'n theemusse van Zandbergen, 'n rollade van Jewans van Aalderen en van Lohuizen en d'r hebt ook vaste beschuut'n van Bats van de Bakker be'j ewes, en zo meer. Oco gaaf viefentvintug guld'n, dat werd "de Groote Pries van Oco", doar mus ie drie moal veur spnt'n. Helsemans en Appie Visscher, de lokale paparazzi, werd'n d'r be'j 'e haald veur de kraante.

En wis en drie, be'j de V.V.V. meld'n zich deelnemers an uut Ommen, maar ook uut Dal-sen en Harden barg en eev'n zo goed uut Heerde en doar rondumme. D'r mus n jury komm'n, ik weete niet meer wie in wolk joar, maar Bult was d'r be'j en Caremans en Jan Kroamer en zo meer, op 'n platte waag'n. Jan van de Berg was wcdstriedcommesares (Kamper Jan, Harm Takman hef em koddens nog 'e nuumd). Ze'j zaid'n dat den d'r verstaand van had. Deelnemers die as'n versnelling an de fietse hadd'n mogg'n kiez'n won'n as ze woll'n gebruik'n en dan deud Kamper Jan d'r isolatiebaand umme toe, doarvan konn'n ze niet meer schaak'len as ze'jaag'n. D'r muss'n ook gewoone baand'n op zitt'n, maar 'n ecbt rees-stuur mog wel, want Max en Henk van de Schipper hadd'n d'r al iene en we'j muss'n 't reeg-lement toch wat noar de Lodderaars toe schriem. D'r kwaamp nog knap wat volk kiek'n, maar de Lodderaars deud'n 't niet zo best. Peter Kroamer leup de kett'n van de fietse en Henke van de Schipper veul d'r oaf. Toon as ze em vreung'n of'e wat mankeer'n, zee 'e: "*N' dök in'n poot*." Deur de scharpe boch'n be'j de Houtmanstroate en de Olde Wheeme gunk de gaank d'r te vulle uut en doarvan keek'n de Lodderaars uut noar 'n aander "circuit". A'j meer

oaver de Lodderaars wilt weet'n, mu'j 't 'maar zegg'n, dan schrief ik, be'j gezondheid 'n
aander moal wieder.